

রেজিস্টার্ড নং ডি এ-১

বাংলাদেশ



গেজেট

অতিরিক্ত সংখ্যা
কর্তৃপক্ষ কর্তৃক প্রকাশিত

বুধবার, নভেম্বর ৭, ২০১৮

বাংলাদেশ নির্বাচন কমিশন
নির্বাচন কমিশন সচিবালয়
নির্বাচন ভবন, আগারগাঁও, ঢাকা
প্রজ্ঞাপন

তারিখ : ২৩ কার্তিক, ১৪২৫ বঙ্গাব্দ/০৭ নভেম্বর, ২০১৮ খ্রিস্টাব্দ

এস, আর, ও নং ৩২৬-আইন/২০১৮।—Representation of the People Order, 1972 (P.O. 155 of 1972) এর Article 94 এ প্রদত্ত ক্ষমতাবলে নির্বাচন কমিশন নিম্নরূপ বিধিমালা প্রণয়ন করিল :—

১। সংক্ষিপ্ত শিরোনাম ও প্রবর্তন।—(১) এই বিধিমালা জাতীয় সংসদ নির্বাচন (ইলেক্ট্রনিক ভোটিং মেশিন) বিধিমালা, ২০১৮ নামে অভিহিত হইবে।

(২) ইহা অবিলম্বে কার্যকর হইবে।

২। সংজ্ঞা।—(১) বিষয় বা প্রসঙ্গের পরিপন্থি কোন কিছু না থাকিলে, এই বিধিমালায়,—

(ক) "অডিট কার্ড" অর্থ ইভিএম কার্যকরণ (operational) এবং ভোটগ্রহণ শেষে ভোটকেন্দ্রের ফলাফল প্রকাশের কাজে ব্যবহৃত কার্ড;

(খ) "আদেশ" অর্থ Representation of People Order, 1972 (P.O. 155 of 1972);

(গ) "অনুচ্ছেদ" অর্থ আদেশের কোনো অনুচ্ছেদ;

(১৪৪৬৭)

মূল্য : টাকা ১২.০০

- (ঘ) "ইলেক্ট্রনিক ভোটিং মেশিন (EVM)" অর্থ অনুচ্ছেদ 2 (xia1) এ সংজ্ঞায়িত ইলেক্ট্রনিক ভোটিং মেশিন;
- (ঙ) "এসডি কার্ড" অর্থ তথ্য ধারণের জন্য ব্যবহৃত মেমোরি কার্ড যাহাতে সংশ্লিষ্ট প্রতিদ্বন্দ্বী প্রার্থীদের এবং ভোটকেন্দ্রের ভোটারদের বায়োমেট্রিকসহ ভোটার তালিকার তথ্য সংরক্ষিত থাকিবে;
- (চ) "কন্ট্রোল ইউনিট" অর্থ ভোটার সনাক্তকরণ, ইলেক্ট্রনিক ব্যালট ইস্যু ও ভোট প্রদানের তথ্য সংরক্ষণ কাজে ব্যবহৃত যন্ত্র বা ডিভাইস;
- (ছ) "কারিগরি কমিটি" অর্থ বিধি ৬ এর উপ-বিধি (১) এর অধীন গঠিত কারিগরি কমিটি;
- (জ) "কারিগরি উপদেষ্টা কমিটি" অর্থ বিধি ৩ এর উপ-বিধি (১) এর অধীন গঠিত কারিগরি উপদেষ্টা কমিটি;
- (ঝ) "কাস্টমাইজেশন" অর্থ নির্বাচনে ব্যবহারের নিমিত্ত সংশ্লিষ্ট ভোটকেন্দ্রের ভোটারদের বায়োমেট্রিকসহ ভোটার তালিকার তথ্য, প্রিজাইডিং অফিসার, সহকারী প্রিজাইডিং অফিসার, পোলিং অফিসার এবং প্রতিদ্বন্দ্বী প্রার্থীদের তথ্য কমিশন কর্তৃক অনুমোদিত প্রোগ্রামের মাধ্যমে অডিট কার্ড, পোলিং কার্ড ও এসডি কার্ডে সংরক্ষণ করা;
- (ঞ) "চিপ (Chip)" অর্থ অনুচ্ছেদ 26C(4) এ উল্লিখিত চিপ যাহা অডিট কার্ড, পোলিং কার্ড এবং এসডি কার্ডে ব্যবহৃত হইবে;
- (ট) "পোলিং কার্ড" অর্থ সংশ্লিষ্ট ভোটকক্ষের (polling booth) ভোট গ্রহণের যাবতীয় তথ্য সংরক্ষণের জন্য ব্যবহৃত কার্ড;
- (ঠ) "ফরম" অর্থ এই বিধিমালার কোনো ফরম;
- (ড) "বায়োমেট্রিক" অর্থ ভোটারের আঙ্গুলের ছাপ; এবং
- (ঢ) "ব্যালট ইউনিট" অর্থ ভোটারের ভোট প্রদানের জন্য ব্যবহৃত যন্ত্র বা ডিভাইস।

(২) এই বিধিমালায় ব্যবহৃত যে সকল শব্দ বা অভিব্যক্তির সংজ্ঞা প্রদান করা হয় নাই সেই সকল শব্দ বা অভিব্যক্তি আদেশে বা তদধীন প্রণীত বিধিমালায় যে অর্থে ব্যবহৃত হইয়াছে সেই অর্থে প্রযোজ্য হইবে।

৩। **কারিগরি উপদেষ্টা কমিটি গঠন, ইত্যাদি।**—(১) অনুচ্ছেদ 26B এর অধীন ইভিএম অনুমোদনের লক্ষ্যে কমিশন উপযুক্ত ব্যক্তিগণের সমন্বয়ে একটি কারিগরি উপদেষ্টা কমিটি গঠন করিতে পারিবে।

(২) কারিগরি উপদেষ্টা কমিটি অনুচ্ছেদ 26B এবং বিধি ৪ এ উল্লিখিত বিষয়ে নিশ্চিত হইয়া ইভিএম এর বিষয়ে কমিশনের নিকট সুপারিশ প্রদান করিবে।

(৩) উপ-বিধি (২) এর অধীন প্রাপ্ত সুপারিশ বিবেচনা করিয়া কমিশন ইভিএম অনুমোদন করিতে পারিবে।

৪। **ইভিএম এর বৈশিষ্ট্য।**—অনুচ্ছেদ 26B এর বিধান সাপেক্ষে, ইভিএম ব্যাটারী অথবা বিদ্যুৎ চালিত একটি কন্ট্রোল ইউনিট ও ব্যালট ইউনিটের সমন্বয়ে হইবে এবং উহা কন্ট্রোল ইউনিট ও ব্যালট ইউনিট আন্তঃসংযোগের মাধ্যমে কার্যকর থাকিবে।

৫। **ব্যালট ইউনিটে প্রতিদ্বন্দ্বী প্রার্থীর নাম ও প্রতীক।**—(১) ব্যালট ইউনিটে প্রতিদ্বন্দ্বী প্রার্থীর নাম, প্রতীক ও ক্রম প্রদর্শিত হইবে।

(২) ইভিএম এর কন্ট্রোল ইউনিট চালু এবং ব্যালট ইউনিটে সংযোগের পর ব্যালট ইউনিটে প্রতিদ্বন্দ্বী প্রার্থীর নাম ও প্রতীক দৃশ্যমান হইবে।

৬। **কারিগরি কমিটি।**—(১) ইভিএম এর কারিগরি দিক পরীক্ষা করিবার জন্য কমিশন কারিগরি কমিটি গঠন করিতে পারিবে।

(২) কারিগরি কমিটি—

(ক) ইভিএমসমূহে ব্যবহৃতব্য এসডি কার্ড, পোলিং কার্ড এবং অডিট কার্ড কাস্টমাইজেশনের জন্য প্রয়োজনীয় সফটওয়্যার, কন্ট্রোল ইউনিটে ভোটারের ডাটাবেজ এর সঠিকতা যাচাই ও পরীক্ষা-নিরীক্ষা করিবেন; এবং

(খ) দৈবচয়নের ভিত্তিতে কমপক্ষে ১% ইভিএম এর কার্যকারিতা পরীক্ষা করিবেন।

(৩) কারিগরি কমিটি উপ-বিধি (১) এর অধীন পরীক্ষা-নিরীক্ষা করিবার পর ফরম-১ অনুসারে ইভিএম এর কার্যকারিতা লিখিতভাবে প্রত্যয়ন করিবে।

৭। **কাস্টমাইজেশন টিম।**—(১) প্রতিটি নির্বাচনে ইভিএম ব্যবহারের জন্য কমিশন ৩ (তিন) সদস্য বিশিষ্ট প্রয়োজনীয় সংখ্যক কাস্টমাইজেশন টিম গঠন করিতে পারিবে।

(২) কাস্টমাইজেশন টিম নির্বাচন কেন্দ্র ও কক্ষ ভিত্তিক এসডি কার্ড, পোলিং কার্ড এবং অডিট কার্ড কাস্টমাইজ ও পারসোনালাইজেশনের দায়িত্বে থাকিবেন এবং তাহারা বিধি ৬ এর উপ-বিধি (২) এ উল্লিখিত বিষয়াদি পরীক্ষা করিয়া দেখিবার জন্যও দায়িত্বপ্রাপ্ত হইবেন।

৮। **ইডিএম প্রেরণ।**—(১) নির্বাচনে ভোট গ্রহণের পূর্বে কমিশন হইতে রিটার্নিং অফিসারকে নির্বাচনী দ্রব্যাদির সহিত ইডিএম এর কন্ট্রোল ইউনিট ও ব্যালট ইউনিটে উল্লিখিত নম্বর এবং পোলিং কার্ড, অডিট কার্ড ও এসডি কার্ডে উল্লিখিত নম্বর সংরক্ষণপূর্বক নিম্নবর্ণিত দ্রব্যাদি বুঝাইয়া দিবেন, যথা :—

- (ক) নির্দিষ্ট সংখ্যক ইডিএম (কন্ট্রোল ইউনিট ও ব্যালট ইউনিট);
- (খ) নির্দিষ্ট সংখ্যক সীল করা One Time Programmable পোলিং কার্ড এবং অডিট কার্ড;
- (গ) পিন এবং পাসওয়ার্ড সম্বলিত সিল করা খাম; এবং
- (ঘ) এসডি কার্ড।

(২) রিটার্নিং অফিসার ইডিএমসমূহ নিরাপত্তার সাথে সহকারী রিটার্নিং অফিসারের নিকট প্রেরণ করিবেন এবং সহকারী রিটার্নিং অফিসার উল্লিখিত দ্রব্যাদি নিরাপদে রাখিবেন।

(৩) সহকারী রিটার্নিং অফিসার ছবিসহ ভোটার তালিকা এবং উপ-বিধি (১) এ বর্ণিত দ্রব্যাদি প্রিজাইডিং অফিসারকে বুঝাইয়া দিবেন।

৯। **প্রিজাইডিং অফিসারের দায়িত্ব।**—(১) প্রিজাইডিং অফিসার ইডিএম গ্রহণ করিবার পর প্রতিটি কক্ষের সহকারী প্রিজাইডিং অফিসারদেরকে ইডিএম বুঝাইয়া দিবেন এবং সহকারী প্রিজাইডিং অফিসারদের সহকারে কক্ষভিত্তিক মেশিনসমূহ সেটআপ করিয়া কন্ট্রোল ইউনিট এবং গোপন কক্ষে ব্যালট ইউনিটসমূহ স্থাপন করিয়া উহার কার্যকারিতা পরীক্ষা করিয়া দেখিবেন।

(২) প্রিজাইডিং অফিসার বা, ক্ষেত্রমত, সহকারী প্রিজাইডিং অফিসার ভোট গ্রহণের পূর্বে ভোট কক্ষে ব্যবহৃত ইডিএম ও ব্যালট ইউনিট প্রতিদ্বন্দ্বী প্রার্থী বা তাঁহার এজেন্টদের সম্মুখে প্রদর্শন করিবেন এবং ব্যালট ইউনিটে প্রতিদ্বন্দ্বী প্রার্থীর তালিকা অনুযায়ী নাম ও প্রতীক সন্নিবেশিত আছে মর্মে নিশ্চিত করিবেন।

(৩) প্রিজাইডিং অফিসার ফরম-২ অনুযায়ী রেকর্ড সংরক্ষণপূর্বক প্রত্যেক ভোট কক্ষের সহকারী প্রিজাইডিং অফিসারকে ইডিএম বুঝাইয়া দিবেন এবং সংরক্ষিত রেকর্ড সম্বলিত উক্ত ফরমটি অন্যান্য ফরম ও প্যাকেটের সহিত ব্যাগে ভর্তি করিয়া রিটার্নিং অফিসারের নিকট জমা দিবেন।

(৪) ভোট গ্রহণ শেষে সকল কক্ষের কার্ডসহ কন্ট্রোল ইউনিটসমূহ সহকারী প্রিজাইডিং অফিসারদের সহযোগিতায় ভোট গণনার জন্য নির্ধারিত একটি কক্ষে নিয়া আসিবেন এবং একটি মেশিন হইতে কেন্দ্রভিত্তিক ফলাফল মুদ্রণ করিবেন।

১০। **সহকারী প্রিজাইডিং অফিসারের দায়িত্ব।**—(১) প্রিজাইডিং অফিসারের উপস্থিতিতে সহকারী প্রিজাইডিং অফিসার কন্ট্রোল ইউনিট ও ব্যালট ইউনিট সংযুক্ত করিয়া মেশিনের সুইচ অন করিবেন এবং সরবরাহকৃত এসডি কার্ড, অডিট কার্ড এবং পোলিং কার্ড নির্দিষ্ট স্লটে প্রবেশ করাইয়া এবং প্রদত্ত PIN ও Password প্রদান করিয়া ইভিএমটি চালু করিবেন।

(২) সহকারী প্রিজাইডিং অফিসার ভোট গ্রহণ শুরুর পূর্বে পোলিং এজেন্টদের উপ-বিধি (১) এ বর্ণিত বিষয়াদি প্রদর্শন করিবেন এবং কন্ট্রোল ইউনিটের ডিসপ্লেতে এবং তাহার প্রিন্ট কপি বাহির করিয়া Demo লেখা ও Total Vote এর সংখ্যা শূন্য দেখাইয়া এই মর্মে নিশ্চিত করিবেন যে, উহা ডেমো মোড এ রহিয়াছে অর্থাৎ ইভিএমটিতে ইতিপূর্বে কোন ভোট প্রদান করা হয় নাই।

(৩) সহকারী প্রিজাইডিং অফিসার উপ-বিধি (২) এর অধীন বাহির করা প্রিন্ট কপিতে উপস্থিত নির্বাচনি এজেন্টগণের স্বাক্ষর গ্রহণ করিবেন এবং উহা নির্ধারিত প্যাকেটে ভরিয়া অন্যান্য ফরম ও প্যাকেটের সহিত ব্যাগে ভর্তি করিয়া রাখিবেন এবং পরবর্তীতে অন্যান্য ফরম ও প্যাকেটের সহিত ব্যাগেভর্তি করিয়া রিটার্নিং অফিসারের নিকট জমা দিবেন।

(৪) ভোট গ্রহণ শুরুর পূর্বে সহকারী প্রিজাইডিং অফিসার উপ-বিধি (১), (২) ও (৩) এ বর্ণিত বিষয়াদি উল্লেখপূর্বক ফরম-৩ অনুযায়ী সংশ্লিষ্ট প্রিজাইডিং অফিসারকে একটি প্রত্যয়নপত্র প্রদান করিবেন এবং প্রত্যয়নপত্রটি অন্যান্য ফরম ও প্যাকেটের সহিত ব্যাগে ভর্তি করিয়া রিটার্নিং অফিসারের নিকট জমা দিবেন।

১১। **ডেমো ভোট গ্রহণের মাধ্যমে ইভিএম এর কার্যকারিতা ও নিরপেক্ষতা যাচাই।**—(১) ভোটদান পর্ব শুরুর আগে উপস্থিত প্রতিদ্বন্দ্বী প্রার্থী এবং পোলিং এজেন্টগণ ডেমো ভোট দিয়া মেশিনটির কার্যকারিতা ও নিরপেক্ষতা যাচাই করিয়া দেখিতে পারিবেন।

(২) সহকারী প্রিজাইডিং অফিসার ডেমো ভোট শুরুর প্রথমে ইভিএম এর মাধ্যমে শূন্য ভোট নিশ্চিত করিবেন এবং একজন ডামি ভোটারকে ভোট প্রদানের জন্য আহ্বান করিবেন।

(৩) ডামি ভোটার ব্যালট ইউনিটে তাহার পছন্দনীয় প্রতিদ্বন্দ্বী প্রার্থীকে ভোট দিবেন এবং তিনি যাহাকে ভোট দিলেন তাহা একটি কাগজে লিপিবদ্ধ করিবেন।

(৪) ডেমো ভোট গ্রহণের পর ডেমো ফলাফলের জন্য সহকারী প্রিজাইডিং অফিসার অডিট কার্ড কন্ট্রোল ইউনিটে প্রবেশ করত ভোটারগণকে তাহাদের ডেমো ভোটের ফলাফল দেখাইতে পারিবেন।

১২। **ভোটারের পরিচয় নিশ্চিতকরণ।**—(১) কোন ভোটার ভোট প্রদানের জন্য ভোটকক্ষে উপস্থিত হইবার পর ভোট প্রদানের পূর্বে সহকারী প্রিজাইডিং অফিসার ভোটার তালিকাসহ কন্ট্রোল ইউনিটে ভোটারের বায়োমেট্রিক ম্যাচিং অথবা স্মার্ট কার্ড অথবা ভোটার নম্বর অথবা জাতীয় পরিচয়পত্রের নম্বর ব্যবহার করিয়া ভোটারের পরিচয় সম্পর্কে নিশ্চিত হইবেন।

(২) যেক্ষেত্রে ভোটারের আঙ্গুলের ছাপ ম্যাচিং হইবে না সেইক্ষেত্রে সংশ্লিষ্ট ভোটারের স্মার্ট কার্ড অথবা ভোটার নম্বর অথবা জাতীয় পরিচয়পত্রের নম্বর ব্যবহার করিয়া ভোটারের পরিচয় সম্পর্কে নিশ্চিত হইয়া সহকারী প্রিজাইডিং অফিসার, নির্বাচন কমিশন কর্তৃক নির্ধারিত হারের ভোটারের জন্য, তাহার আঙ্গুলের ছাপ দিয়া ইলেক্ট্রনিক ব্যালট ইস্যু করিতে পারিবেন।

(৩) এই বিধির অধীন যেই সকল ভোটারের আঙ্গুলের ছাপ ম্যাচিং হইবে না এবং সহকারী প্রিজাইডিং অফিসার আঙ্গুলের ছাপ দিয়া ইলেক্ট্রনিক ব্যালট ইস্যু করিবেন সেই সকল ভোটারের জন্য পৃথক লগ পোলিং কার্ডে সংরক্ষিত হইবে।

১৩। **ভোটদান পদ্ধতি।**—(১) বিধি ১২ এর অধীন ভোটারকে সনাক্ত করিবার পর একজন পোলিং অফিসার তাহার আঙ্গুলে অমোচনীয় কালি প্রদান করিবেন এবং অপর পোলিং অফিসার তাহার নিকট রক্ষিত ছবিসহ ভোটার তালিকায় তাহার স্বাক্ষর অথবা টিপসহি নিয়া উপস্থিত এজেন্টদেরকে ভোটারের ক্রমিক নম্বর জানাইয়া দিবেন ও ছবিসহ ভোটার তালিকায় টিক চিহ্ন প্রদান করিয়া সহকারী প্রিজাইডিং অফিসারকে ব্যালট ইউনিট সচল করিতে অনুরোধ করিবেন এবং অমোচনীয় কালি প্রদান সম্পন্ন হইলে সহকারী প্রিজাইডিং অফিসার ভোটারের জন্য ইলেক্ট্রনিক ব্যালট ইস্যু করিবেন।

(২) ইলেক্ট্রনিক ব্যালট ইস্যু হইবার সঙ্গে সঙ্গে সহকারী প্রিজাইডিং অফিসার ভোটিং মেশিনে “ভোটগ্রহণ প্রক্রিয়া চলছে, অনুগ্রহ করে অপেক্ষা করুন” মেসেজটি দেখিতে পারিবেন এবং ভোটারকে ভোট প্রদানের জন্য গোপন কক্ষে পাঠাইবেন।

(৩) গোপন কক্ষে প্রবেশের পর ভোটার যে প্রতিদ্বন্দ্বী প্রার্থীকে ভোট প্রদান করিতে চাহেন সেই প্রতিদ্বন্দ্বী প্রার্থীর নাম ও প্রতীকের পাশের বাটন চাপিয়া প্রতীক পছন্দ করিয়া সবুজ রঙের বাটন চাপিয়া ভোট প্রদান সম্পন্ন করিবেন, কোন কারণে ভোটার ভুল প্রতীকের বাটনে চাপ দিলে এবং উহা সংশোধন করিতে চাহিলে তাহার পছন্দের প্রতীকের বাটনে পুনরায় চাপ দিয়া ভোট প্রদান করিতে পারিবেন, এইভাবে দুইবার তিনি সংশোধন করিতে পারিবেন, তৃতীয় বার যে প্রতীকের বাটনে চাপ দিবেন সেই প্রতীকেই ভোট প্রদান সম্পন্ন হইবে।

(৪) ভোটারের ভোট প্রদান সম্পন্ন হইলে সহকারী প্রিজাইডিং অফিসার কন্ট্রোল ইউনিটে “ভোটগ্রহণ সম্পন্ন” মেসেজটি দেখিতে পাইবেন এবং ভোটার “আপনার ভোট সম্পন্ন হয়েছে, ধন্যবাদ” কথাটি শুনিতে পাইবেন।

(৫) ভোটার পরিচয় নিশ্চিতকরণ এবং উপ-বিধি (৩) ব্যতীত ভোট প্রদান পদ্ধতি প্রদর্শনের জন্য প্রয়োজনবোধে পৃথক ডিসপ্লে ডিভাইস ব্যবহার করা যাইবে।

১৪। প্রিজাইডিং অফিসারের নিয়ন্ত্রণ বহির্ভূত পরিস্থিতিতে ভোটগ্রহণ প্রক্রিয়া, ইত্যাদি।—(১) যদি কোনভাবে কোন ভোটকেন্দ্রের ভোটগ্রহণ কার্যক্রম নিয়ন্ত্রণ বহির্ভূত কারণে ব্যাহত হয়, সেইক্ষেত্রে সম্ভব হইলে সহকারী প্রিজাইডিং অফিসার কন্ট্রোল ইউনিটে ব্যবহৃত পোলিং কার্ডটি কন্ট্রোল ইউনিট হইতে বাহির করিয়া নিবেন, এবং পরিস্থিতি নিয়ন্ত্রণে আসিলে প্রিজাইডিং অফিসার রিটার্নিং অফিসারকে পরিস্থিতি অবহিত করিয়া পুনরায় ভোট গ্রহণ শুরু করিবেন।

(২) যান্ত্রিক ত্রুটি জনিত কারণে যদি কোন ইভিএম এ ভোট গ্রহণ করা সম্ভব না হয়, সেইক্ষেত্রে সহকারী প্রিজাইডিং অফিসার উহা প্রিজাইডিং অফিসারকে অবহিত করিবেন এবং প্রিজাইডিং অফিসার সংশ্লিষ্ট রিটার্নিং অফিসারের অনুমতি গ্রহণপূর্বক কেন্দ্রে সংরক্ষিত ব্যাকআপ ইভিএম অবশিষ্ট ভোট গ্রহণের নিমিত্ত সহকারী প্রিজাইডিং অফিসারকে হস্তান্তর করিবেন; অতঃপর সহকারী প্রিজাইডিং অফিসার পূর্বের ন্যায় ভোট গ্রহণ শুরু করিবেন এবং এইক্ষেত্রে সহকারী প্রিজাইডিং অফিসার কক্ষে উপস্থিত পোলিং এজেন্টগণকে গোলযোগের পূর্বে গৃহীত ভোটের সংখ্যার সাথে “পোলিং কার্ড” এ সংরক্ষিত মোট গৃহীত ভোটের সংখ্যা যে মিল রহিয়াছে তাহা প্রদর্শন করিবেন।

(৩) কোন যান্ত্রিক গোলযোগ বা প্রিজাইডিং অফিসারের নিয়ন্ত্রণ বহির্ভূত অন্য কোন কারণে যদি ভোটগ্রহণ এমনভাবে বাধাগ্রস্ত হয় যে, নির্ধারিত সময়ের মধ্যে ভোট গ্রহণ শুরু করা অথবা পুনরায় ভোটগ্রহণ শুরু করা সম্ভব নয় বা ভোটকেন্দ্রের ফলাফল নির্ধারণ করা সম্ভব নয়, তাহা হইলে প্রিজাইডিং অফিসার ভোটগ্রহণ বন্ধ ঘোষণা করিয়া রিটার্নিং অফিসারকে অবহিত করিবেন।

(৪) উপ-বিধি (৩) এর অধীন ভোটগ্রহণ বন্ধ করিয়া দেওয়া হইলে, রিটার্নিং অফিসার অবিলম্বে উক্ত ঘটনা সম্পর্কে কমিশনকে অবহিত করিবেন এবং কমিশন প্রয়োজনীয় ব্যবস্থা গ্রহণ করিবেন।

১৫। ভোট গ্রহণ শেষে সহকারী প্রিজাইডিং অফিসারের দায়িত্ব।—(১) সহকারী প্রিজাইডিং অফিসার ভোট গ্রহণ শেষে পোলিং এজেন্ট এবং আইনগতভাবে অনুমতিপ্রাপ্ত ব্যক্তিবর্গের সম্মুখে “ভোট শেষ” বাটনটি চাপিবেন যাহার ফলে উক্ত ইভিএম এ আর কোন ভোট গৃহীত হইবে না।

(২) সহকারী প্রিজাইডিং অফিসার ভোট গণনার জন্য ইভিএম প্রিজাইডিং অফিসারের নিকট নিয়া যাইবেন।

১৬। ভোট গণনা।—প্রিজাইডিং অফিসার আইনগতভাবে অনুমতিপ্রাপ্ত ব্যক্তিবর্গের সম্মুখে কেন্দ্রভিত্তিক ইভিএম এর কন্ট্রোল ইউনিট হইতে ফলাফল মুদ্রণ করিবেন, এবং মুদ্রণকৃত ফলাফল এর কপিতে প্রিজাইডিং অফিসার নিজে স্বাক্ষর করিবেন এবং উপস্থিত পোলিং এজেন্টদের স্বাক্ষর গ্রহণ করিবেন, কেহ স্বাক্ষর প্রদানে অস্বীকৃতি জ্ঞাপন করিলে উহাও লিপিবদ্ধ করিবেন।

১৭। **ভোট গণনার বিবরণী প্রস্তুত।**—প্রিজাইডিং অফিসার বিধি ১৬ এর অধীন ইভিএম হইতে মুদ্রিত ফলাফল অনুচ্ছেদ ৩৬ এর দফা (৯) অনুসারে নির্বাচন পরিচালনার বিধিমালা, ২০০৮ এর ফরম-১৬ এ ভোট গণনার বিবরণী প্রস্তুত করিবেন।

১৮। **ইভিএম এর ফলাফল পুনরায় যাচাই।**—রিটার্নিং অফিসার কোন ভোটকেন্দ্রের ইভিএম এর ফলাফল পুনরায় যাচাই করিবেন না, যদি না—

- (ক) কোন প্রতিদ্বন্দ্বী প্রার্থী বা তাহার নির্বাচনি এজেন্ট কর্তৃক লিখিতভাবে প্রিজাইডিং অফিসারের গণনা সম্পর্কে আপত্তি করা হয় এবং রিটার্নিং অফিসার ঐ আপত্তির যথার্থতা সম্পর্কে সন্তুষ্ট হন; অথবা
- (খ) তিনি কমিশন কর্তৃক ইহা করিতে আদিষ্ট হন।

১৯। **ভোট গণনার পর ইভিএম ও ব্যবহৃত এসডি কার্ড, অডিট কার্ড এবং পোলিং কার্ড হস্তান্তর।**—ভোট গণনা শেষে ফলাফল ঘোষণার পর প্রিজাইডিং অফিসার ভোটকেন্দ্রে ব্যবহৃত এসডি কার্ড, অডিট কার্ড ও পোলিং কার্ড একটি প্যাকেটে সিলগালা করিবেন এবং উহা অন্যান্য নির্বাচনি মালামালের সাথে ব্যাগে রাখিয়া সিলগালা করিয়া ইভিএম এর কন্ট্রোল ইউনিটসহ অন্যান্য যন্ত্রপাতি রিটার্নিং অফিসার বা সহকারী রিটার্নিং অফিসারের নিকট জমা দিবেন।

২০। **ব্যবহৃত ইভিএম সংরক্ষণ ও পুনঃব্যবহার।**—(১) নির্বাচন শেষে রিটার্নিং অফিসার ইভিএমসমূহ সংশ্লিষ্ট জেলা নির্বাচন অফিসারকে বুঝাইয়া দিবেন এবং জেলা নির্বাচন অফিসার কমিশনের নির্দেশনা অনুসারে সংরক্ষণ করিবেন।

(২) সংরক্ষিত ইভিএমসমূহ কমিশনের নির্দেশনা মোতাবেক অন্য কোন নির্বাচনে ব্যবহারের ব্যবস্থা গ্রহণ করিবেন।

ফরম-৩

[বিধি ১০(৪) দ্রষ্টব্য]

ইভিএম এর কার্যকারিতা সম্পর্কিত সহকারী প্রিজাইডিং অফিসারের প্রত্যয়নপত্র

	নির্বাচনি এলাকার নম্বর ও নাম
--	------------------------------

এই মর্মে প্রত্যয়ন করা যাইতেছে যে,	
------------------------------------	--

(ভোট কেন্দ্রের নম্বর ও নাম)

ভোট কেন্দ্রের নম্বর ভোটকক্ষে সরবরাহকৃত ইভিএমটির কার্যকারিতা পরীক্ষা করিয়া সঠিক পাওয়া গিয়াছে।

ক্রমিক নম্বর	পোলিং এজেন্টের নাম	পোলিং এজেন্টের স্বাক্ষর
১	২	৩

স্থান

সহকারী প্রিজাইডিং অফিসারের নাম,
স্বাক্ষর ও সীল (যদি থাকে)

তারিখ			দিন			মাস				বৎসর
-------	--	--	-----	--	--	-----	--	--	--	------

নির্বাচন কমিশনের আদেশক্রমে

হেলালুদ্দীন আহমদ
সচিব।

মোঃ লাল হোসেন, উপপরিচালক, বাংলাদেশ সরকারী মুদ্রণালয়, তেজগাঁও, ঢাকা কর্তৃক মুদ্রিত।
মোঃ আব্দুল মালেক, উপপরিচালক, বাংলাদেশ ফরম ও প্রকাশনা অফিস, তেজগাঁও,
ঢাকা কর্তৃক প্রকাশিত। website: www.bgpress.gov.bd